



Cumün da Scuol

Dal cussagl cumünal

In sias ultimas sezzüdas ha il cussagl cumünal trattà surtuot las seguaintas fatschendas:

Imboccadüra Via da Tarasp → Via d'Engiadina

Specialmaing in connex culla zona da mansteranza Buorna esa da far quint cun daplü trafic sülla Via da Tarasp. L'attach a la Via d'Engiadina nun es bun. Dal 1996 vaiva l'uffizi da construcziun bassa miss in vista al cumün da Scuol cha l'attach gnarà realisà tenor necessità in connex culla zona da mansteranza chi d'eira quella vouta amo in planisaziun. Uossa es la planisaziun finida, e'l prüm edifiz es in fabrica. Il cussagl cumünal ha decis da pichar porta pro l'uffizi da construcziun bassa e pretender la realisaziun da l'attach sco che'l es stat progettà in connex culla correcziun da la Via d'Engiadina tanter Nairs e Scuol vest.

Imposta fundiaria

Ils respunsabels d'ün alloggiader per vacanzas han fat al cumün la dumonda per üna deliberaziun da l'imposta fundiaria. I dà lös in Grischun ingio cha talas gestiuns sun deliberadas da quist'imposta. Il cussagl ha listess decis da refüsar la dumonda. Cun gnir davo a quist giavüschi as drivissa la porta eir per otras dumondas in quist sen. Il cumün contribuischa plünavant vi dad implants turistics (PSFS, BES, Trü etc.) chi vegnan buns a tuot ils giasts da Scuol.

Signalisaziun turistica

Il cumün da Tarasp ha dumandà per plazzar duos tablas d'infuormaziun our'in Cuttüraplana e Nairs. Il cussagl es pront da dar ün permiss per metter sü tablas turisticas. El es però da l'avis chi stopcha gnir sün quellas tablas eir il logo da la destinaziun. Plünavant stessan esser las culuors dals placats las listessas sco quellas dals placats previss per Scuol.

Vandalissem

Il cussagl cumünal ha darcheu stuvü tour cogniziun da dons pervi da vandalissem. La bos-cha sper la sendina dal pader es sfrachada giò o stratt'oura. Eir vi'n Gurlaina haja dat dons, bancs sun gnüts büttats giò pellas costas eui. Sco chi para sun partecipats vi da quists o eir oters acts da vandalissem uffants da chomps da vacanzas, ma per part eir giuvenils indigens. Quist vandalissem es zuond deplorabel e metta in dumonda diversas masüras d'imbellimaint in cumün.

Votumaziuns: uras d'avertüra da l'urna

Il cussagl cumünal es perinclet cha l'ura d'avertüra da l'urna la dumengia vain redotta al minimum tenor ledscha (= üna mezz'ura). Nouv urari: da las 09:30 fin las 10:00h (invezza da fin las 10:30 sco fin uossa). Il motiv per quista reducziun es dad üna vart il fat chi vegnan insomma fich pacas persunas a vuschar persunalmaing, da tschella vart less la cancellaria cumünala ils resultats il plü svelt pussibel. Las charteras in chasa cumünala vegnan svödadas eir in avegnir l'ultima jada la dumengia al mumaint cha l'urna vain serrada.

Il nouv urari vala fingià pella prosma votumaziun als 26 settember 2010.

Scoula Avrona

La scoula d'Avrona es in privel da gnir serrada, quai na l'ultim pervi da la nova politica pella scolaziun speciala dal departamaint chantunal d'educaziun EKUD. Il capo ha clamà aint üna maisa raduonda per discuter quist problem. Quella ha chattà ün grond rebomb fich positiv pro'ls partecipants. I füss don e puchà da laschar ir serrada la scoula sü Avrona chi nun es be importanta per Tarasp, ma eir pella regiun. Il president da la PEB ha scrit sün quai insembel cul capo üna charta al cussagl administrativ. In seguit vessa da dar inscunters eir cul nouv regent dal Grischun chi surpiglia l'EKUD.

Müdamaints da zonas in Brentsch e Manaröl

Brentsch

Il clerai da Brentsch vain transfuormà in üna zona per implants publics (ZÖA, qvd. cha implants sun pussibels, fabricats però brich), quai per cha'l cumün possa cumprar il terrain da la Banca Chantunala. Actualmaing è'l zona agricula, la cumprita nu füss perquai pussibla. La senda per peduns chi traversa il clerai sto restar in mincha cas.

Manaröl

In connex cul center da passlung cumbinà cun abitaziuns chi dess gnir fabricà in Manaröl esa da far ün müdamaint da la zona (zona per implants publics → zona d'abitar cun üna quota d'indigens da 100 %). Il perimeter da la zona vain eventualmaing amo adattà, tuot tenor il proget chi vain tschernü pella surfabricaziun.

Il cussagl ha deliberà tuots duos müdamaints per l'examinaziun preliminara tras ils uffizis chantunals. La votumaziun es previssa als 28 november 2010.

Revisiun parziala da la ledscha da fabrica

La cumischiun da planisaziun (CDP) ha discus las propostas per revisiuns parzialas da la ledscha da fabrica, elavuradas dal giurist da fabrica dr. Rainer Metzger e fat propostas per mans dal cussagl cumünal. Il cussagl ha approvà quistas propostas cun ün pêr müdamaints. La revisiun parziala vain suottamissa a la cumünanza d'urna als 28 november 2010, insembel culs müdamaints da zona in Brentsch e Manaröl. Als 4 october ha lö üna radunanza cumünala d'orientaziun.

Plan da quartier Clozza

Il cumün prevezza d'introdüer il plan da quartier Clozza. Dürant la publicaziun da quist'intenziun sun entrats duos recuors. Il cussagl es da l'avis cha'ls arguments dals recurrents nu bastan e prevezza perquai da refusar ils recuors, davo avair consultà amo il giurist da fabrica dal cumün.

Pendicularas Motta Naluns

In connex culla pürificaziun da la situaziun da proprietà da la via da Ftan, dal marchapè e da la piazza da parcar davant il Bellaval ha cedü il cumün da Scuol a las PSFS üna surfatscha da 109 m² à CHF 60.--, dimena total CHF 6'540.--.

Il cussagl ha plünavant approvà üna cunvegna chi regla divers puncts tanter il cumün e las PSFS. I's tratta impustüt da la s-chala cuernada tanter l'areal da la Viafier Retica e'l passagi lung la Via da Ftan. Daspö chi'd exista la nouva colliaziun (passarella) serva quista s-chala impustüt als abitants dal quartier Spinatscha. Il cumün es perquai pront da surtour la s-chala e da far eir il mantegniment.

Surdattas da lavuors

Provedimaint d'aua e chanelisaziun Porta

Elavuraziun dal proget cumplessiv e direcziun da fabrica: büro d'indschegners Canclini & Peer Scrl., Scuol

Stradun: @center - Banca Chantunala

Stüdi da variantas e proget da publicaziun: büro Caprez Indschegners SA, Scuol

Sanaziun da la via da god Plan Mar

Lavuors d'impresari: firma Koch SA, Ramosch

Val Lischana

Lavuors da s-chav: Bezzola Denoth SA, Scuol

Installaziuns sanitarias pella lingia d'aua: Vitali Haustechnik AG, Zuoz

Pervi da l'otezza da l'import ha il cumün stuvü scriver oura publicamaing quistas lavuors e nun ha pudü be invidar ils affars indigens.

Dumondas da fabrica

Il cussagl resp. la direcziun han dat ils seguaints permiss da fabrica:

- Eberhard + Elisabeth Böschen-Knecht, Via da Ftan: suost per autos/urdegns
- Armon Cantieni, Dualatsch: 2 lobgias vi da la fatschada vers vest

sco eir per progets plü pitschens sco müdamaints interns, collecturs solars e tablas da recloma.